

般若波羅蜜多心經

唐 三藏法師玄奘 譯

觀自在菩薩，行深般若波羅蜜多時，
照見五蘊皆空，度一切苦厄。

舍利子！色不異空，空不異色；
色即是空，空即是色，
受想行識亦復如是。

舍利子！是諸法空相，
不生不滅，不垢不淨，不增不減。

是故，空中無色，無受想行識；
無眼耳鼻舌身意；無色聲香味觸法；
無眼界，乃至無意識界；
無無明，亦無無明盡，
乃至無老死，亦無老死盡；
無苦集滅道；無智亦無得。

以無所得故，菩提薩埵。
依般若波羅蜜多故，心無罣礙；
無罣礙故，無有恐怖，
遠離顛倒夢想，究竟涅槃。

三世諸佛，依般若波羅蜜多故，
得阿耨多羅三藐三菩提。

故知：般若波羅蜜多是大神咒，
是大明咒，是無上咒，是無等等咒，
能除一切苦，真實不虛。

故說般若波羅蜜多咒，即說咒曰：

揭諦揭諦，波羅揭諦，波羅僧揭諦，菩提薩婆訶。

迴向偈

願以此功德，莊嚴佛淨土；
上報四重恩，下濟三途苦。
若有見聞者，悉發菩提心；
盡此一報身，同生極樂國。

關於這份檔案

經文採唐三藏法師玄奘譯本，全文 260 字（不含標點），未作任何刪節或改字。

本檔為純文字版，供誦讀、列印與隨身攜帶使用。

注音版與白話註解請見 vege.club 網站上的完整版頁面。